

KURAMBAGIZA UWO MUZABANA

Gushyingirwa ni byo bibasha kureshya no guhindura ubugingo bwanyu muri iyi si no mu isi izaza. Umukristo nyakuri ntazerekeza imigambi ye muri ibyo, ataramenya yuko Imana ibyemeye. Ntazabasha kuba ari we wihitiramo, ahubwo aziyumvamo yuko Imana ari yo ikwiriye kumuhitiramo. Ntidukwiriye kwinezeza ubwacu, kuko Kristo atinezezaga ubwe. Ntawanyemera mvuze yuko umuntu uwo ari we wese akwiriye gushyingirwa uwo adakunda. Ibyo byaba ari icyaha. Ariko kugira ingeso yo gupfa gutekereza no gushaka kwinezeza mu buryo bworoshye ntibikwiriye, kuko bijyana umuntu ku kurimbuka. Imana ishaka umutima wose, n'urukundo rusesuye [...]

Abasore b'abakristo bakwiriye kwitonda cyane mu byo gukundana no guhitamo bagenzi babo. Mwirinde, kugira ngo ibyo mutekereza ubu ko ari izahabu nziza bitaba inkamba. —***Inama zigirwa itorero, p.141.***

Pima icyo ureba cyose, witegereze amajyambere yose y'ingeso z'uwo ugambiriye gufatanywa na we mu bugingo bwawe. Iyi ntambwe ugiye gutera ni imwe yo mu zikomeye cyane mu bugingo bwawe, kandi ntikwiriye guteranwa ubwira. **Naho wakunda, ntugakunde utabanje gutekereza.**

Guhitamo umufasha muzabana iteka gukwiriye kuba ukuzana imibereho myiza y'umubiri, iy' ubwenge, n'iy'iby'umwuka ku babyeyi no ku bana babo, kukazabashisha ababyeyi n'abana guhesha umugisha bagenzi babo no kubaha Umuremyi wabo. —***Inama zigirwa itorero, p.142.***

Umwari akwiriye kwemera mugenzi we bazabana iteka, ufite ingeso zitunganye za kigabo, umugabo w’umunyamwete kandi wiringirwa, ukunda Imana kandi akayubaha. Witandukanye n’umunyagasuzuguro; witandukanye n’ukunda kunebwa; witandukanye n’ukerensa ibintu byera. Wirinde kubana n’ukunda kuvuga ibibi, cyangwa uwamenyereye kunywa *nubwo cyaba ari ikirahuri kimwe cy’inzoga*. —***Inama zigirwa itorero, p.143.***

Ubukristo bwagombye kuba ari bwo mbaraga iyobora abantu gushyingiranwa, ariko ni kenshi cyane impamvu zitera abantu gushyingiranwa ziba zidashingiye ku kubahiriza amahame ya Gikristo. Satani aba ashaka gukomeza ububasha bwe ku bantu b’Imana akoresheje kubashora mu kwifatanya n’abakozi be. —***Abakurambere n’Abahanuzi, p.477.***

“Gushyingiranwa kubahwe n’abantu bose.” Abaheburayo 13:4; ni imwe mu mpano z’Imana ku muntu, kandi ni umwe mu mihango ibiri Adamu yakuye muri Paradizo amaze kugwa mu cyaha. Igihe amahirwe mvajuru yitaweho kandi akubahirizwa, gushyingiranwa biba umugisha; birinda ukwera n’umunezero by’abantu, bigaha umuntu ibyo akeneye mu buzima, bikazamura imikurire y’umubiri, iy’ubwenge ndetse n’iy’iby’umwuka. —***Abakurambere n’Abahanuzi, p.29.***

Basore namwe nkumi, Uwiteka atubereye maso kandi azaduhitiramo neza nitwumvira ubushake bwe amarangamutima yacu akaburizwamo maze akaba ari we utuyobora!